

·sanjvwz·

Ndaw Fwn Rumz Miz Mwngz Doxbuenx

风雨中有你相伴

□ Veiz Couyiz / 韦绉怡

Haemhlwenz roengz raq fwn ndeu, fwn seisaesae, lumj fagcim siuqva nei, dingzdingz duenhduenh doek youq ndawreih, youh lumjbaenz haujlai naedcaw daj gwnzmbwn vanq roengzdaeu. Dingq gij sing fwn neix, gou youh ngeix daengz mwngz—gyaq ci iq gou.

Geiq ndaej bi haenx, gou caeuq gvan gou doengzcaez bae Namzningz cieq mwngz dauq. Seizhaenx mwngz lumj dahsau ndaej cibbet nei, yaek hai ok diemq gai ci seiz, boux lauxbanj dawz baengzhoengz venj youq song henz baihnaj mwngz, daengz seizndei le, de couh youq bakdou ndoiq aen lingz de, dou couh hai mwngz dauq—ranz lo.

Daeujdaengz ranz, dou heuh goengdauh daeu guhmo, bauj mwngz cangqheiq bingzan.

Vihliux hawj mwngz miz congh dieg youq ndeu, dou cingz vunz daeu lingh coih ranz baez ndeu, sai bae cibhaj ngoenz, ngaenzhong bae sam fanh lai.

Moix singhgiz it daengz singhgiz haj, gou gyanghaet couh hai mwngz bae hagdangz, haemh le youh doxcaez dauqranz. Vihliux mwngz mbouj deng dak ndit, gou youq gwnzvjangi cawx benq baengz ndeu daeu goemq mwngz. Gou caeuq mwngz lumj baengzyoux caezhoz nei, bouxlawz hix liz mbouj ndaej bouxlawz, yienghneix gvaq le seiq bi.

Miz haemh ndeu byonghhwnz, doek fwn gig daih, lumj aeu bat daj gwnzmbwn buet raemx roengzdaeu nei. Gou ninz ndaej gig ndaek, moengzmoengz loengzloengz dingqnyi miz sing lwngyez daejvauvau. Gou

roxnyinh, aiq dwg daeglwg gou bingh lo, hai daeng yawjraen faj naj de hoengzmaemae, fwnz lumh gvaqbae, aen gyauej de ndatveuveu, gou gipmuengz dawz dijvnhcinh daeu rau, ndangraeu miz 40.5 doh, fatndat lo.

Gou daenj buh ndei le, guh—muengz umj daeglwg hwnj ci couh hai bae yihyen. Youq ndaw fungh—gipgouq, daeglwg ndat ndaej genga hainduj hwnjgeuq bae. Canghyw naeuz: “Danghnaeuz mwngz daeu nguh di dem, daeglwg mwngz couh nanz gouq lo.” Neix dwg goenglauz mwngz—ci iq, danghnaeuz mbouj miz mwngz, gou couh mbouj ndaej baenzneix vaiq bae yihyen, mbouj ndaej baenzneix vaiq bae yihyen couh gouq mbouj ndaej mingh daeglwg.

Geiq ndaej miz baez he, gou sinhcingj bingz guh boux lauxsae maenhndei ndawsi, ngoenzgonq gou gaengq dienz ndei biuj, yaek gyau bae ndawsi seiz cij fatyienh ndawbiuj miz di swliu dienz loek lo, gou lienzhwnz hai mwngz bae hagdangz dienz biuj, cienz baengh mwngz lo.

Geiq ndaej bi 2019 haemhndaep, gou gwn caeuz imq le, cingq naengh youq sahfa yawj vanjvei ndwencieng. Sawqmwh ndaejnyi miz vunz roq dou, gou haidou baez yawj, dwg daeggo caeuq nangzdaih daeu laeng gou youz, dou song ranz vunz haujlai nanz mbouj doxcomz lo. Songde baez daengz, couh gyaed dwk mazciengq guhcaemz, hai mwngz daj ndawranz ok baihrog bae. Dou guh’angq gvaq—yinx dangqmaz, gyo’mbaiq mwngz lo.

Miz ngoenz ndeu, gou youq

ndawranz sawqmwh dingqnyi miz maz doxgaiq doek youq gwnzndang mwngz, gij sing de yiengj baenzlai hung. Laxlawz dwg lwgbag, gwnzndang mwngz miz vunqsieng lai lo. Gou sim’in dangqmaz, couh siengj buet ok rog ranz bae hai mwngz hauej ndawranz bae. Gvan gou sikhaek daih sing hemq hwnjdaeu: “Mwngz mbouj aeu mingh la? Lwgbag baenzneix hung, danghnaeuz yaep ndeu moeb deng gwnzgyaeu mwngz ne, uk luenh bw!”

Nyi naeuz yienghneix, gou doiq laeng song sam yamq, mbouj rox baenzlawz guh cij ndei, yawj—ngoengngoeng coh mwngz youq rog ranz deng lwgbag moeb, gij raemxda gou hix doek mbouj dingz.

Gou mbouj miz sim bae guh gij wnq lo, dan ndwn youq henz cueng yawj mwngz. Gvaq le yaep ndeu, mbouj doek lwgbag lo, gou doq cung

ok douranz bae, hai mwngz hauej ndawranz daeu. Caenh doek lwgbag lo, gvaq le song sam ngoenz, Duh’anh Yauzcuz Swciyen dou couh miz binghraq, daengx aen yienhsingz cungj deng fung liux, dou ngoenzngoenz caez youq ranz, gyawz hix mbouj ndaej bae. Raen gwnzndang mwngz miz haujlai congh gumz roengzbae, itcig mbouj ndaej bae coih mwngz.

Caj daengz binghraq gvaqbae le, youh nyaengq guhhong. Cigdaengz cuengqgyaj le, gou cij ndaejhoengq bae coih mwngz, seizneix yienznaeuz gij yienghceij mwngz gaeuqyietiet, ndawsim gou cix hai lumj vavengj, baenzbaenz mwngz lij hai ndaej, mbouj deng lwgbag moeb vaih.

Gyo’mbaiq mwngz—gyaq ci iq gou, ndaw fwn rumz cungj miz mwngz doxbuenx. Faenh cingz neix, gou baenz ciuhvunz cungj mbouj ndaej lumz.



Vunzmbanj Duncuz Sanhgyangh aeu mbaw godoengz suek ceiz.

Gungh Bujgangh ingj

·Sawcuenhraz Lwngyez·

Gij Golwngyez Henz Dahhoengz

红水谣

□ Lanz Haijyangz Moz Beibei / 蓝海洋 莫蓓蓓

Gou yienznaeuz mbouj rox maz heuhguh gyaunde, cix rox ndeiawj couhdwg gyaunde, doenghbaez, baenzlawz mbouj roxnyinh Simj—mehvej maj ndaej baenzneix ndeiawj ne? Vunzmbanj cij naeuz meh gou ndeiawj, gou nyinhnaeuz Simj—mehvej yawj hwnjdaeu cij dwg beij meh gou laux di ndwi, doengh bi neix daeu de deng haemz deng hoj, goemq gij ndeiawj de bae caez lo.

“Ahbyauh.”

De sawqmwh heuh gou, gou doq cienq lwgda yawj gizwnq bae.

“W!”

“Aulungzgeiz daengz ranz mwngz?” Simjmehvej mbouj baenq gvaqdaeu muengh gou, gou youh yawj coh naj de, de lij nyenghnyengh cimyawj feiz ndawloz, lumj haxbaenh cam feiz mbouj dwg cam gou nei.

“De mbouj daeu ha!”

“Baenzneix—gij ywdoj neix dwg—”

“O, dwg youq gwnzroen, Aulungzgeiz heuh gou soengq daeu hane.”

“De mbouj nyienh gag soengq daeu?” Simjmehvej cam coenz vah neix seiz, lwgda daj feiz yawj coh gou.

Gou ndoj gij ronghda de, caiq oet diuz fwnz hauej ndawcauq bae.

“Mbouj dwg, de naeuz gou buet ndaej vaiq.”

“O……”

Simjmehvej baez riunyumj, hoeng baez yaep da couh siu lo, lumj gij ronghfeiz ndawloz youq gwnz naj de yubyab nei.

“Aulungzgeiz dwg vunzndei lwi?” Gou mbeihung cam de, hoeng gij vah neix cix lumj cam bonjfaenh.

“Mwngz naeuz de dwg vunzndei lwi? Ahbyauh.” Simjmehvej youh ngaemgyaeu cim feiz ndawloz, de caeuq gou doxdoengz, hix lumj cingq gag cam bonjfaenh.

Gou caen siengj gangj gij vei Aulungzgeiz okdaeu, hoeng, baez ngeix, roxnyinh lwngyez saedcaih mbouj wnggai bae dwen gij saeh vunzhung, cijndei ndwnj vah hauej ndawdunx bae.

“Gou mbouj rox.”

“Ai!”

“Mwngz vihmaz danqheiq? Simjmehvej.”

“Ahvej mingh caen dwg hoj……”

(caengz sat)